

Патриотизм мен ерлік – тәрбие бастауы

Әскери-патриотизм тәрбиесі жасөспірімдерді еліне деген сүйіспеншілікке, ұлттық армия сапына адал қызмет атқаруға, азаматтық қасиеттерге баулиды. Бала әрдайым өмірге қызыға қарайды. Жастарды қазіргі экономикалық өмір салтының талаптарына лайықты етіп тәрбиелеу және оларды жан-жақты дамыған азамат ретінде өсіру мектептің және мұғалімдердің, сонымен бірге әскери жетекшілердің міндеті.

Мұғалім қауымы – қоғам сенген өкіл. Қазіргі кезде мектептегі мұғалімдер жасөспірімдерді саяси-идеялық жағынан шындап, бүгінгі қоғамның мұраттарына сенімі мол саналы азаматтар даярлауды өздерінің қасиетті борышы санайды. Мұндай күрделі мақсаттарды іске асыруда тәлім-тәрбие жұмыстарының түрлері де әралуан. Мысалы, жастардың саяси-қоғамдық клубтары, түрлі үйірмелер. Әскери тәрбие жастардың Отан алдындағы азаматтық борышы мен жауапкершілігін терең түсіндіруге негізделеді. Олардың азаматтық қасиетін шыңдау үшін тарихи ойындарға экскурсиялар ұйымдастыру, даңқты жерлерді, қалаларды көрсету, еңбек және майдан ардагерлерімен кездесулер оқушылар санасына ойланарлықтай әсер етіп, ой түюге көмектесетін тағылымы мол шаралар.

Жасөспірімдердің жерлес атақты адамдар туралы деректер жинауы туған жерге деген мақтаныш сезімін туғызады. Олардың ісін құрмет тұтып, үлгі алуына көмектеседі.

Елімізде мектеп оқушыларын әскери даярлық пен ұлтжандылыққа тәрбиелеп, жемісті еңбек етіп жүрген ұстаздар көптеп саналады. Олар оқу бағдарламасының талаптарына сай, өзге оқу пәндері сияқты шәкірттердің алғашқы әскери дайындық пәнін де тиянақты меңгеріп, адамгершілік құндылықтарды жоғары бағалайтын, ұлтын, Отанын, тілін ардақтайтын ұрпақ тәрбиелеуге баса көңіл аударуда. Жасөспірімдерді қыры мен сыры мол әскери мамандыққа мектептен бастап даярлау – қоғам мен ұлттың армия алдындағы

әлеуметтік міндеті және азаматтық борышы. Сонымен бірге мектепте әскери білім беру сапа жағынан да жаңа деңгейге көтерілді. Түрлі әскери өнерге баулитын (сапта жүру, мергендер) жарыстар «Алау», «Сұңқар» командалары ұйымдастырылып, оқушылар спорт саласындағы әскери ойындармен айналысады, жаттығады.

Мектепте Жеңіс мерекесі қарсаңында соғыс, еңбек ардагерлерімен кездесу ұйымдастырылып, түрлі тәрбие сағаттарын патриоттық тәрбиеге арнаймыз. Реферат жұмыстарын тапсырып, деректерді іздестіру арқылы туған елдің, ата-апаларымыздың кешегі өткен тарихымен таныстыруға мүмкіндік береміз. Әскери тақырыпқа фотосуреттер көрмесін ұйымдастырып, оқушылардың атсалысуын қадағалаймыз. Осындай іс-шаралар оқушыларға ерліктің, еңбектің қадір-қасиетін түсінуге мүмкіндік береді, тәрбиелейді.

Отан қорғауға жастарды дайындау қазіргі кезде бұрынғыға қарағанда айрықша көңіл бөлінуде. ҚР «Жалпыға бірдей әскери міндеттер және әскери қызмет» жайлы заңына қоса ҚР үкіметінің 1996 жылы 1-қарашада шыққан №1340 жарғысына сай орта мектептерде алғашқы әскери дайындық пәні мемлекеттік пән ретінде оқытылуда. Пәннің міндеті – келешекте Отанын, жерін, елін қорғай алатын ұлттық намысы

мол, жігерлі ұл-қыз тәрбиелеу, әскер қатарына сауатты, моральдық жағынан дайын азамат даярлау.

Облысымызда 132 ӘПК болса, қалада 20-ға жуық ӘПК 2150 оқушы қамтылып отыр. Сондай-ақ, әскери-патриоттық клубтар қалалық, облыстық сайыстарға, жиындарға қатысады. Соның бір дәлелі, №40 ЖОБМ «Сайыпқыран сарбаздары» ӘПК қалалық, облыстық, республикалық, Халықаралық сайыстардың жеңімпаз жүлдегерлері. Қазіргі таңда №41 ЖМБМЛ «Ақжайық арландары» ӘПК қалалық, облыстық сайыстардың жеңімпазы атанса, күні кеше өткен ҚР және РФ арасындағы «Бауырластық-2013» Қостанай облысы Лисаковск қаласында өткен Халықаралық жиында III орынды иеленсе, қыркүйек айында өткен әскерге шақырылған, шақырылатын және Кадет корпусындағы жастар арасында әскери қолданбалы спорт түрлерінен жүлделі III орынға иеленіп өз жалғасын табуда.

Қазіргі таңда облысымызда «Қайсар» және «Жігер» әскери-патриоттық ұйымдары құрылып, өз жұмыстарын жүргізуде.

Ербол НИСБУЛЛИНОВ,
Батыс Қазақстан мемлекеттік
университетінің
АӘД пәнінің оқытушысы.

